

**Textes dits pour
les parlers du Gard
2022**

MOUN VILAGE

L'An passa, lou tèmo requist pèr « Li parla de Gard », èro lou de l'Amista. Vaste sujet sènso limito. Aqueste an lou tèmo sus lou vilage rameno cadun à si raro. Vilage de neissènço, de jouvènço, de vido d'uei o de touto uno vido. Aquéli darrié tres mot m'encanton. Touto uno vido au miéu, à camina dins li piado de mis aujòu. Moudèsto coussò, belugueto dins li rai qu'esclairon ma pichoto patrio. Vaqui lou debana de soun istòri. Lis arqueologue, aquéli saberu que fan parla li pèiro, afourtisson que li premiéri cabano an espeli i'a mai de vingt-e-cinq siècle au cresten d'uno colo bèn destacado dóu planestèu vesin. Dins lou vabre un sourgènt garantissié lou béure, e lou manja trepejavo à l'entour. Pièi li Volco, vengu s'abéura à la sourso de Nemausus, ié bastiguèron un oupidon. À la Pas Roumano, li couloun devengu pacan, davalèron dins la plano. À l'age-mejan uno premiero masado, pièi un pau pus liuen, à l'an milo, lis oustau se recampèron à l'entour d'uno glèiso novo. Si parrouquian chausiguèron coume sant patroun dous fraire mège martire en Sirio, soto Dioclitien, au siècle tresen : Cosme e Damian. Lou vilajoun avié un noum crestian, mai aquelo santo prouteicioun sauvè pas lou santuari de la ràbi di camisard, tambèn persecuta. Dous cop afoundra, dous cop releva, à l'image d'aquéu pople de pacan toujours soulidari en front dis envasioun, di guerro, di fèbre vo di pognaduro de la naturo.

Es dins aquéu pichot mounde terrenau, ounte cadun gardavo si counvicioun e sa Fe, mai ounte la soulidarita l'empourtavo sus li batèsto, qu'ai grandi à l'escouto dis àvi e en esperant moun dre à la paraulo. De-segur tout l'an, pèr tóuti li sesoun, de coutrio, à espera li recordo pourgido pèr aquesto terro abelano, acò ligavo lis ome dins uno coumunauta apararello mau-grat quàuqui jalousié. Fau dire que lis eternau darrié soun toujours renaire o reboussié. Devié pas èstre uno especialita de la Vau-Nage, countrado benurouso coumparado à un bèu mótoun, que Sant-Come n'en sarié lou rougnoun.

L'avès coumprés, aviéu pas besoun de m'escavarta pèr trouba lou Bounur. Es eici qu'ai grandi, ama, proucrea, acoumpagna mis enfant dins la vido, e mis àvi dins si calabrun. Moun darrié souvèt, sara qu'à l'ouro de plega li parpello, la terro de moun vilajoun me reçaupe, meirenalo, pèr assouida uno longo vido d'un brès à un cros.

Jan-Glaude CROUZET-VERRIEUX, Sant-Come-e-Maruèjo
Escolo felibrenco Ciéucle Lengo d'O
Cantoun d'Aigo-Morto

CAMINO QUE CAMINARAS À L'ENTOUR DE MOUN BÈU VILAGE

Ai jamai autant espaceja dins li camin de moun rode, que despièi l'encafournamen e me siéu souspresso de tourna descurbi de caire que fasié uno bello vóuto qu'aviéu pas mes li pèd. Se pau dire qu'avèn la chabènço d'agué à l'entour d'encò nostre de subre-bèu païsage. Alors me siéu pensado de faire d'image de moun passage à chasque cop que quicon me fasié gau fin de garda de bèu souveni.

Lis mas : Vau pas li cita tóuti, n'ïa uno moulounado soun vint-e-sièis au toutau. N'ai percoula mai que d'un sus lou terradou de moun vilage d'Eimargue, coume lou de Grand-MALHERBES o li mas de RIEUTORD, BUADE, BORD, Sant-BLANCAR. Aquéli mas coustituísson uno richesso ecounoumico e culturalo remarcablo.

Camina vers la crous di penitènt gris : Un pau d'istòri, vaqui n'uno d'image, es lou calvaire emé la crous di penitènt gris dóu siècle dès-e-nouven (19 en) que se trobo au miejour dins la coumuno d'Eimargue au pont de la Cubello, au crousadou di camin que se dison di peissounié e di roumiéu à-n-un kiloumètre sèt-cènt dóu vilage. Aquesto crous fuguè erezido lou tres de mai de milo-vue-cènt-vint pèr lou fraire priéu J. Langlade, la counfrarié di penitènt gris dounavon d'ajudo i malaut (messo, proucessioun) fugué coungreiado en Eimargue l'an de milo-sièis-cènt-quatorge enjusqu'à l'an de milo-vue-cènt-trento, la counfrarié de penitènt gris perdura sèmpe en Aigo-Morto. La restauracioun dóu calvaire fuguè realisado en partido pèr l'assouciacioun LITORARIA. Em'acò à la seguido ai percoula la draio en direicioun di mas de PRAT-VIÉU e aquest dóu Castèu de TEILLAN.

Lou mas de PRAT-VIÉU: Coustrucioun de la fin dóu siècle dès-e-nouven es à proussimeta dóu Castèu de TEILLAN. PRAT-VIÉU pousseda un amiradou à soun tresen estànci. Es dins lou Mas de PRAT-VIÉU qu'a viscu La manadiero Founfono GUILLIERME, grando amigo dóu Marqués Folcò de Baroncelli, fugué la proumiéro fenno manadiero e cavaliero de triò, Founfono a toujours fa prima sa passioun pèr li biòu es devengudo despièi uno icono de la Camargo.

Lou Castèu de TEILLAN : Marca i Mounumen Istouri, situa à tres kiloumètre au miejour dóu vilage d'Eimargue. Es un ancian castrum rouman se disié « Vila TELLIANIS » que li mai ancian doucumen daton de l'an vue-cènt-quatorge e nòu-cènt-sieissant. Au siècle dès-e-nouven, fuguè vendú à l'Abadié Saumòsi. Bono-di un decret de l'an milo-sièis-cènt-trente-cinq, li proupietàri dóu castèu fuguèron autorisa à recampa dins lou subre-bèu pargue, di vestige rouman : terme militàri e pieloun rouman. Lou pargue es parieramen marca i Mounumen istouri, se pau vèire uno pouso-raco e pijounié dóu siècle dès-e-nouven. Se pau tambèn remira de bèu escapouloun d'aubre.

Subre li levado de Vidourle : Li moulin e la vido vidanto à l'entour de l'Age-Mejan au siècle vinten, mai de seissant moulin temouniavon de l'aproufichamen de l'energjo idraulico e dóu vènt pèr faire tourna li pèiro di moulin e proudurre de farino e d'òli, pratico vuei abandounado, à l'ouro d'aro se pau vèire dous moulin endeca pèr lou tèms. L'endeman pèr uno bello journado ensouleiado ai persegui moun escourregudo, direicioun li mas la JASSO, TOIRAS, Sant-BLANCAR, lou Grand CHARROUN, lou Grand BORDE, Lou Grand BOUSQUET, aquéu mas, Roubert que ié disèn Gazò i'a passa uno partido de soun enfanço, pèr mai d'entre-signe Roubert fuguè moun menoun de campagno e coume cassaire i'avié pas un rode mounte i'avié pas mes li pèd. Emé sa mouié Genevivo sian tóuti dous à l'escoute de si raconte. Vaqui VALESCURO darnié mas avans li palun d'Eimargue aqui sian pas en Alsaço, mai pulèu au rode que se dis la « PALUNETO ».

Encò di cigougno : Un parèu soun vengudo faire sa nisado. Lou nis es basti en grando partido de gavèu de vigno, es trop bèu qu'aquéu parèu siegue revengu, se dis que chasque an soun fidèu à soun nis. E s'acoumençon de couva trento-dous jour cadun à soun tour. Souvète que tout viro bèu e que li pichot cigougnoun espeliran bèn-lèu.

Aquéu parèu de Cigougno sèmlon dire aqui sian bèn !

Veici un pau d'amour e de tendresso, « dins n'aquéu mounde destourba ».

Gabrielo VALETTE, grafio mistralenco

MOUN BÈU VILAJOUN

Dequé i'a ti de mai bèu que soun vilajoun ?
Lou que, proun crespina, ié veguère lou jour.
Lou qu'es encencha di gràndi permenado,
 'mé si bèlli platano en autinado
Que pourgisson au permenaire sa sousto,
 I pèd-tancaire soun espàci dessouto.

L'estiéu es un plasé de ié prene la fre,
 Charra emé vesin e ami, à l'adré,
Mentre que lis enfant jogon, quouro i biòu,
 Quouro à la marello, tant à l'esquiròu,
 I biho, belèu au baloun, o au mouloun,
Li droulas cridon : au mouloun que n'i'a pas proun.

Iéu ! ço que m'agradavo èro la fèsto,
Que dins lou tèms, nous fasié vira la tèsto,
 Emé si bèlli semano de Bouvino,
Que rèn destourbavo, pas mai la plouvino
 Que li vidourlado o que li broufounié,
 Dejunavian acampa à la pradarié.

Lou sèr estrenavian li braio de gardian,
Fièr, auturous, pèr carriero, se passejavian,
 Camiso marrelado, moucadou de còu
Se prenian pèr de vrai gardian de mestié,
De-segur moun vilage es un païs de biòu,
Qu'autambèn sèns éli la fèsto noun sarié.

L'avès coumprés vous ai parla dóu vilage
De ma primo 'nfanço, lou que m'a fabreja,
Qu'à mis iue i'a pas mai bèu, e qu'à moun age,
 M'agrado, 'mé sis estajan de parteja,
 Un pau de soun istòri, de si vibranto
 Cascareto de la vido vidanto.

Li de moun bèu vilajoun, que ié disèn Eimargue

Gabriéu BRUN

MOUN VILAGE

Mountagneto aubourado entre mar e Ceveno,
As toujours apara ti carriero d'antan.
Toun auturo ansin qu'un signau fuguè ta veno
Quouro Vidourle mountavo coume un gigant.

Li rouman tracèron lou camin doumician
Viha sus la colo pèr un vaste ópedo.
Ambrussum es lou poulit noum que gramacian
D'èstre lou temouin de la routo de sedo.

Li galò-rouman abandounèron la Ciéuta.
Au levant, Galargue, prenguères la seguido,
E pièi l'age-mejan t'adournè de bèuta.
Aro poudèn te vesita em'uno guido.

À la debuto dóu siècle dès-e-vuechen,
Lou pople camisard fuguè lèu matrassa.
Toun relarg escoundu siguè un bon soustèn
Pèr lis ome e li femo d'un mounde estrassa.

Siés un santuàri de nòsti tradicioun,
E li simbèu que me vènon à l'idèio
Que siegue lou Marqués, Founfono, vo Granoun,
An tóuti enlusi toun noum sus l'epoupèio.

De noste tèms li gènt an chanja de vesiou
La Naturo s'esclapo em'un boulegadis
Que la foulié dis ome fai sènso resoun,
Mai tu demouraras dins toun bèu paradis.

Roubert Faure, Escolo felibrenco Ciéucle Lengo d'O

Moun vilajoun

Aquest vilajoun entre-mitan lau e séuvo

Vese aquest vilajoun coume se mirave de carto poustalo anciano, si carriero estrecho, sis oustau quicha e sa plaço centralo.

La plaço ei lou cor dóu vilage, emé si boutigo, si cafè, de-segur sa glèiso e un pau en reculamen sa coumuno. Li cafè, liò de rescontre, de vido, de discutido avivado, ié tournon faire lou mounde ; se i' aplanton avans que de rintra au siéu, que noun la vesprado se persequigue sus la plaço emé un balèti, musico e danso.

De la plaço seguissou aquesto carriero que mounto sus la colo, « la carriero di Cèu » que de-segur es bèn noumado, que meno à-n-aquesto pichoto capello, cachouso, entimo, perdudo au mitan di pradarié que nous counvido à la meditacioun vo à la preguiero, coume que siegue au siau.

En davalant, arribon au canau que li nivoulino autounalo fan veni fantaumati, mai pèr li lipet e li groumand, es un liò de predileicioun pèr acampa li berigoulo !

Au mitan de la plaço uno pichoto carreireto davalo vers lou lau e sis oustau ópulent de mounte uno barco s'escapo à bèlli fes. Lou lau, rebat dóu cèu, sèmblo cambia d'imour au grat di vènt que lou fan oundeja. Un jour blu, un jour negre segound li caprice dóu tèms, sara-ti lou mirau de l'amo di permenaire ?

En ribejant lou lau, arribon à l'ancian moulin, basti à l'age mejan, que n'en rèsto que l'abitacioun mai que se dis toujours « Lou moulin », e soun pont de pèiro que marcon l'intrado de la séuvo. La séuvo percoulado de pichot riau que raion entre li pèiro de granit, aquésti caos de roucas pausa aqui pèr quàuqui gigant, bessai ?

Tre l'orle de la séuvo, emé la « baumo dóu diable », aquesto cafourno cavado pèr li riau, intron dins un mounde clafi de legèndo e de mistèri, mai acò es un autre raconte !...

Genevivo TERREUX, grafio mistralenco
Escolo felibrenco Ciéucle Lengo d'O

MOUN VILAJOUN

Quouro siéu nascudo, i'a un pau mai de cinquante-sèt an, i'avié à quicon proche en Aigo-Morto quatre-milo-tres-cènts estajan. Li famiho se counaissien tóuti. Mi gènt restavon dins li bàrri.

Quouro se sourtié di bàrri i'avié pas forço oustau. l'avié de vigno à perdo de visto.

D'à cha pau i'a agu d'oustau que se soun mounta en deforo, mai i'avié toujours de vigno, d'espargo, se poudié prene li pichot camin à biciécletto, à despart di tratour se vesié pas forço veituro. Se pòu dire qu'erian à la campagno.

Coume sian dins uno viloto qu'ei clafido d'istòri, en mai d'acò proche la mar avian de mounde l'estiéu de juliet à avoust. À l'ouro d'aro i'a de mounde touto l'annado.

La plaço Sant-Louvis entournejado de cafè, sis alo, sa grand carriero ounte i'avié que d'espiçarié, aro i'a mant un restaurat e magasin pèr li touristo.

Avans se disié : moute rèstes tu ? L'autre de respondre dins li rampar o au Pont Rouge o à la Veirarié o à la Pescarié.

Vuei Aigo-Morto comto vue-milo-tres-cènt-sege estajan, pèr iéu la vilo ei partejado en un mouloun de liò : l'interiour di bàrri, lou Pont Rouge, lou Bousquet e la ZAC, lis HLM lou quartié d'Esparoun e la zouno artisanalo emé lou quartier di Marina e di Boudre.

Quouro ère poumpié counaissiéu tóuti li noum di carriero, quouro la gendarmarié nous sounavo pèr nous dire d'ana pourta secous encò de quaucun, pas de besoun d'un plan, just en disènt lou noum sabian ounte anavian.

Pièi lou tèms a passa de novèlli coustrucioun se soun facho, de-segur falié d'oustau pèr li jouino d'Aigo-Morto, que n'ai aprouficha, mai ai vist lou quartié ounte rèste chanja en un trin qu'ei pas de crèire. Un jour ai pres moun velò pèr faire la destribucioun de nosto revisto la Pouchudo, me siéu perdudo, vo me siéu perdudo dins li camin que fasiéu quouro ère jouino à biciécletto emé d'amigo. Cercave li maset dins li vigno o un pin que pousquèsse me dire dins quau camin ère, vesiéu pas que de coustrucioun novello, passave sus de camin qu'eisistavon pas, n'auriéu ploura fasiéu que dire :

- Ah ! se lis ancian revenien...

Uno amigo qu'èro de Nime, me disié :

- Aro ei pas pus moun Nime, recounèisse plus la vilo ounte ai grandi !

E iéu de ié respondre :

- Mai ei parié pèr Aigo-Morto ei pas l'Aigo-Morto de moun enfanço.

Crese que malurousamen tóuti li vilajoun, vilo emé lou tèms chanjon, de cop que i'a lou fau, mai faudrié arresta de moudifica lou terraire pèr faire de coustrucioun !

Silvia PUIG, grafio mistralenco, Escolo felibrenco Ciéucle Lengo d'O

Bellegarde

Couneissès pas moun vilage ? D'un coustat quiha sus la colo, uno tourre emé sa madono e de l'autre li palun emé li sansouiro e li saladello.

De l'aigo n'en coulo de pertout : la font di quatre lioun, dóu Dauphin, di sereno, dou pichot garoun, de la gleiso, de Portalès, de Sant-Jacque, n'ia dans tóuti li quartié, sens òublida lou moulin d'ólivo dins la carrièro di Caulet.

Lou vilage a soun trin-trin : lou chin de Glaudeto que japo is enfant que van à l'escolo ; l'escoubihaire que ramassavo li papié trahina pèr lou vèn ; lis aucèu que cantavon d'empieù sièis ouro dóu matin e que me revihavon ; mai lou gau de la vesino qu'a gagna lou councours de cant dóu Gard e que risco pas de lou tuia. Ansin lou jour s'estiro e à quatre ouro e miège lis enfant rentron à sis oustau, li carriero brusissoun de cri, de cant quauqui fès de plour. Lis ome s'en revenon en caba si batudo dins la campagno, lou vilage retrove soun calme souto lou soulèu que trecolo darrié la coulino e sa tourre. E i'avié tanmbèn Maurice que d'achivau tout lou sanclame dóu jour vanegavo dins li carriero.

Lou divèndre es jour de marca, moute se pòu rescountra Agato la fargato emé si pèu tout espeloufi ; Rouseto, pecaire que la malautié raubo soun enavan ; Iveto, qu'à uno bello maisso, e qu'acheto soun froumage de cabro. Mai tanbèn, sus la terrasso dóu café di Flour, prendre un pichot moument pèr dejuna e racounta li darrièri novo en manja un pichot coucaren e sibla un rosé de la croto de Nostro-Damo. Pièi es l'ouro de s'entaula, tóut lou mounde rentro l'oustau, la biasso es alestido. Après-dina lis ome fan la petanco mai à l'oumbro souto li platano de la plaço Novo.

Pèr la voto coumo dins li vilage vesin, de biòu, encaro de biòu tóuti li jour qu'es la tradicioun e que fan, la joio di jouine e di mens jouine.

Alor avès trouva lou noum de moun vilage moute sièu nascudo ? Sian ? Sian, à Bello-gardo pardi !

Envoi de fleurs (de la tranchée)

(Contribution d'Alain Coullomb de Jonquières. Manduel 2021)

Siáu nascut a Jonquièras

Siáu nascut a Jonquièras
Au cròs de la Costièra,
Dins la Terra d'Argença
Recanton de Provença.
Lo vent-terrau ie bofa ;
Quand fai caud se i estofa.
Pasmens ie vòle viure
Fins mon darrier badalh.

Sei còlas son peirosas,
De frejaus vermenosas.
Sei baissas son fangosas ;
I es mon còr empegat.
Se l'òbra i es penosa
La vida gaire urosa,
Pòs comptar sus lei gents...
S'as besonh de... pas ren.

Es un país de fèsta :
I as lèu tròp de ta vèsta ;
S'as camba encara lèsta,
Ai buòus vai te'n passar!
Que i arrivesses d'Arle,
De Nime o d'Avinhon,
Dins la lenga que parle,
Seràs en comunion .

Sembla un flòc de Camarga
Enclaus dins la garriga ;
De secaressa a carga,
Pasmens d'aiga es prodiga :
Sei fònts son frescas; e claras
Per dau cèu estre dignas.
Se lo gran se fai rare,
Ie manca pas de vinhas:

Lei rasins dau terraire,
Lei vins son reputats
Pariers que sei dansaires,
Pascau lis a cantats.
Nisau de facturaires,
Cantaires e musicaires
Que, come galejons,
Fan son nis dins lei joncs.

Lei camins que n'en venon
A d'autrei bèus luòcs menon ;
Lo terraire a l'entorn
Porgiguet mis amors.
Es mon nis, es ma jaça,
Lo sorgent de ma raça.
Se ditz de tot aucèu
Que troba son nis bèu.

Sant-Roman

Moun Vilage

Siéu nascudo à Sant-Geniés di Mourgues , dins l'Eraud ,proche de Castries, èro un pichotet vilajoun de cinq cènt abitant.

Siéu anado à l'escolo,e passa touto ma jouinesso. Pèr ana dins lou cèntrè pode vous dire qu'acò mounto,lou proumié cop qu'Enri es vengu ,diguè n'e ié tournarai pus jamai,e pamens es revengu bord-que nous sian marida.

Aro vau vous douna l'esplico dóu noum de Sant-Geniés,l'ourigino dóu vilajoun debuto dins lis annado milo -des-e- nòu,lou segneur Godran e si fiéu foundèron un couvènt ,li mourgo beneditino ,counsacrado à Sant -Geniés,sant Arlesien li Mourgues. Li Mourgues , Morgas en Lengadoucian coumpletèron lou noum de Sant-Geniés di Mourgues. En dos-milo-dès-e-nòu l'abadié a festeja soun milenaire e acò èro uno journado meravihouso, grando messo emé l'Archevesque de Mount-pelié,lou clergié, la presènci dóu Felibrige,en Jaque Mouttet ,dóu Majourau Gabrièu Brun de la Mantenènço dóu Lengadò- Roussihoun , di Felibre,,e de la Nacioun Gardiano.

De persouno en esculta Sant-Geniés dins un tronc de bos e pèr d'amatour èro uno reüssidò, pièi un fube de mounde an fa uno proucessioun à l'entour de la glèisio ,coume èro uno journado de fèsto ,taulejado ,curso de biou, presentacioun de l'estatudo dins lis areno,e bandido.

Au mes de desèmbre es uno tradicioun ,li proupietàri d'óulivié carrejon à chivau e carreto lis óulivo enjusqu'au moulin de vilo-vieio pèr n'en faire d'òli ,despart à quatre ouro dou matin ,vilo-vieio es à mai de quinge kiloumètre de Sant-Geniés,li mai courajous fan la caminado à pèd e souvènti fes fai pas caud. Pèr novè fau pas oublida la messo de miejo-niue cantado pèr la couralo que canto en prouvençau,e la crècho,grando , bello, e animado qu'èro l'obro de Gui Dupas pendent mai de 30 annado,aro a passa lou flambèu.A l'entour dóu vilajoun ,li culturo principalo soun la vigno e l'óulivié.l'a tambèn de peiriero de pèiro blanco que soun taiado pèr faire de chaminèio, ,esculturo e d'autri causo. Au mes d'avoust ,la voto pendent uno semana emé abrivado, bandido

curso de biòu sus la plaço e dins lis areno emé de biòu e rasetaire de trio. .Lou vilage es vivènt emé de negòci, boulangarié,boucharié especarié farmaciò couifaire ,cafè, restaurat, tabacaire , posto.

Au mes de janvié i'a tambèn la fèsto de la rabasso qu'acampo forçe mounde.

Lis escolo meirenalo e primàri soun forço impourtanto ,coume dins tóuti li pichot vilajoun devengu aro de grand vilage (1854 amo)

l'a long-tèms que siéu partido de Sant- Geniés mai ai toujours la languitudo de moun vilage ounte siéu nascudo e maridado.

Moun vilage, lou Grau-dôu-Rèi

Quouro espeliguère, avans la guerro, lou Grau èro un paure vilajoun de pescaire, talamen paure que s'es apela dins un tèms "Consac de Gagne Petit". Dins moun enfanço. se parlavo pas de counget paga, nimai d'estivant, encaro mens de touristo ; lou monde que venien se bagnouleja dins la mar lis apelavian li bagnadou, poudien se chanja sus la plajo avans e après soun ban dins li cabino proche di mountiho, e se refresca dins li dos beveto en plancho que ié disian "le Bon Accueil" e "le Petit Bonheur".

Li limito dóu vilage èron à man drecho lou castèu Leenhardt, que ma grand peirenalo n'èro la counsierjo, e à man gaucho la vila Redarès tant impausanto à respèt dis àutris oustau dóu país que ié disian perèu lou castèu Redarès. Venènt d'Aigo-Morto, acò èro la marco vertadiero dóu vilage. Mai lou castèu Leenhardt e la vila Redarès soun esta desmouli, li cabino de plajo e li beveto an desporeigu. À l'ouro d'aro, es devengu uno vilo de 8.000 abitant l'ivèr e mai de 80.000 l'estiéu, uno vilo touristico, uno estacioun de ban de mar monte an planta de paumié que la desfiguron. Se lis ancian revenien, aurien forço peno pèr la recounèisse. Au-jour-d'uei, sus la gaucho, li coustrucioun s'esperlongon jusqu'à la nouvello estenscioun de Port-Camargo, e sus la drecho s'arrèston à ras dóu Moutas.

Aquéu vilajoun fuguè founda vers 1830 pèr de pescaire italian e restè estaca à la coumuno d'Aigo-Morto jusqu'en 1879. monte es devengu uno coumuno autounomo e independènto.

l'a quàuqui mes, à la fin de l'annado 2019, pèr festeja li 140 an de la coumuno , uno espousicioun subre-bello fuguè engimbrando à la vila Parry.

Aquelo espousicioun moustrè pèr lou biais de foutougrafio e de doucumen ancian l'istòri dóu vilage de sis estajan. Se pousquè vèire aqui un mouloun de vièii foutò de classo desempièi lis annado 40 que me ié siéu visto e mi fraire tambèn. ; e de foutò de gènt dóu Grau, escais-nouma "li Pèd-Descaus", de foutò de la pesco e di pescaire.

Es ansin qu'avèn pouscu vèire lou travai di pescaire, si batèu, li mourre de porc, li batèu-biòu, que sourtien pèr ana à la pèsco di toun apelado la sencho e revenien carga de toun, de touno de toun, que descargavon au sòu, sus li pountoun de la ribo gaucho ; la pesco au bouié (en francés bouliech ou bolier) un fielat que se tirassavo à la forço di bras sus la plajo ; la pesco au globe qu'es un fielat estira en travès dóu canau e releva pèr de moulinèu anca sus chasco ribo, li pescaire se tenien dins un nego-chin au mitan dóu fielat que relevavon pau à pau jusqu'à l'autro ribo ounte reculissien li pèis ; de globe n'i'avié tout de long dóu canau tout-aro jusqu'à-n-Aigo-Morto ; aro tóuti aquéli pesco an desporeigu ; de mourre de porc n'i'a plus ges, remplaça pèr de batèu grandaras que podon s'aluencha forço mai di costo e ansin ramena forço mai de pèis dis aigo mai profundo ; de segur es la causo de la rareficioun dóu pèis dins la Mieterrano.

Lou poun d'orgue d'aquelo animacioun fuguè un espetacle de son e d'image forço acoulourido proujeta sus lou vièi fare à la toumbado dóu jour, mi dos fiho e iéu l'avèn vist despièi l'autro ribo, qu'èro clafido de mounde estrambourda.

Aquelo espousicioun permeteguè i Graulen li mai ancian, (que iéu n'en siéu) de se recabussa dins aquèu libre de souveni dóu vilage.

Vous ai parla de moun vilage, un vilage qu'amave forço quouro ère jouineto. L'ai quita à 22 an pèr ana viéure à Lunèu. Au-jour-d'uei l'ame toujours, moun vilage, mai es devengu talamen diferènt que l'amour que ié porte es pas parié, a chanja, éu tambèn. Mai pamens, dins lou founs de moun cor, siéu fièro d'èstre Graulenco.

Ounte es moun vilajoun ?

Siéu nascu dins la gardounenco, à Cruviers-Lascours, ai viscu à Sant-Geniés de Malgouire quauque tèms, mai ère trop pichotet e ai pas forço souvenenço e de mai èro la guerro. Après mi gènt soun ana à Sant-Just dins l'Eraut pèr travaia, e pèr li curso de bióu, moun paire en aqueste moumen èro rasetaire.

Dins aqueste vilajoun ounte ai viscu forço annado de ma bello jouinesso, escoło ,coumunioun ,ai meme fa enfant de cor, counsèu derevisioun, ai tambèn couneigu ma femo qu'èro vengudo pèr la fèsto dóu vilage emé uno amigo. Lou vilage coumtavo tres-cènt-cinquante estajan, aro soun mai de tres-milo- cinq cènt, counéisse praticamen pus grand mounde à despart qu'auqui bon coulègo e de la famiho (de cousin). Me remèmbre la plaço emè sa coumuno, si dous boulenjarié, dous espiçarié, lou cafè, la peissounarié e subre-tout « l'aubre de messorgo », li vièi venié charra de tout e de rèn , quand quaucun passavo pèr carriero ,pode dire qu'èro vesti pèr la journado, mai acò anavo pas liuen, de fes éro li vièi que cargavon e toujours en lengo, fau dire en aqueste pountannado Sant-just coumtavo dous Majourau A Arnaud e J Esteve un mèstre d'Obro L Alverny (Leoun de la cava) e forço felibre e membre de la Nacioun Gardiano .Pèr la festo li curso de bióu se fasien sus la plaço manado Nou de la HouPELLIERO e Zuccarrelli adounc la manado es à dous kiloumètre dins li prat dóu vilage. Es la jouinesso que s'òcupavon de la fèsto emé l'ajudo de la coumuno ,falié rentra lèu-lèu li dardèno, fasien uno loutarié d'un moutoun (que manjavon lou darrié sèr) pièi lis aubado , ,la passejado de la galetto, la fèsto duravo uno semano, lou dilun falié que li dardèno fuguèsson rintrado . Dins li prat i'avié uno manado de chivau tengu pèr dous felibre Rull Delly de Mount-pelié e Bernard Daydé de Paris chasco annado fasien uno festo ufanouso ,ferrado ,rodeò, lasso ,roussataio. E tamben li gènt de St Just fasien lou carnava preparavon li char que se passejavon a St just ,Lunèu , St Nazaire de Pezan e meme aiours .Es lou vilajoun qu'amave e qu'ame encore mai, tóuti si bèlli causo qu'ai couneigudo e que soun pas pus, lou vilage a engrandi, l'aubre de messorgo es mort, la fèsto es la coumuno que se n'en cargo, i'a bèn d'assouciacioun qu'ensajon de relança tout acò ,mai aro i'a trop de causo à faire e forço persouno soun pas d'eici (d' estrangié). O ounte siés moun vilajoun que vesiéu emé mis iue de barbelas e que tout lou mounde parlavon la lengo dóu païs .

MOUN VILAGE, VILO-TELO

Lou galant vilajoun ounte rèste despièi 40 an s'apello Vilo-Telo.

Es bagna pèr lou Vidourle, flume tant capricious que quouro se met en coulèro arrouino furiouslymen vigno, culturo, vergié, empourtant tout sus soun passage, sènso vergougno.

Pamens l'aman forço e es indispensable pèr manto uno resoun, la mai impourtanto es que desseparo lou Gard de l'Eraut.

Tre passa lou pont uno pichoto begudo vous counvido à vous refresca en bevènt un cop sus de taulo de bos, souto li platano, rodo idelen e pasible.

Poudès flana pièi sus lou camin di jardin, en coustejant uno grando lèio bourdado de vièis amourié abartassi.

Un camin pousseus nous adraio vers quàuqui vignarés, emblèmo de nòsti richesso passado.

Un pau pu liuen, li garrigo embaumon la farigoulo, lou cade, lou roumanin, l'aspi e lou fenoui. Tóuti aquéli redoulènci pebrado, muscado, anisiado, counvidon à se pausa.

Sian deja au cor dóu vilage de Vilo-Telo, viloto de 1500 estajan e de 531 eitaro, proche de Lunèu, crea à l'Age Mejan.

Au mitan dóu vilage la glèiso roumano, Sant Geraud dóu siècle dougen.

Davans la glèiso, la placeto caladado, esbléugissènto de soulèu es refrescado pèr uno font provençalo en pèiro. Aquelo bajarello chuchoutejo emé la coumuno vesino.

La pichoto espiçarié emé soun arco en pèiro es pron agradivo.

La boulenjarié emé soun grand parcage aculis lou dimenche de matin un marcat païsan, pèr lou plus grand plasé di coumaire que s'assabènton emé gentun sus soun prouchun.

Lou camin di Capitello nous endraio de-vers aquéli sousto de pèiro seco bastido pèr li bergié.

D'eici d'eila, poudèn crousa quàuqui bedigo, e tambèn quàuqui biòu enclausa.

De magnifis óulivié centenàri empauson lo respèt sus lou camin dis escolo ounte li crid dis enfant se mesclon i cant dis aucèu.

Pièi lou camin dis amelié endraio de-vers lou site arqueoulougi d'Ambrussum ; oupidon rouman, anciano estapo sus la vïo Tolosana, enrega pèr li pelegrin de Coumpoustello, venènt d'Arle e Sant-Gile.

Se ié pòu vèire li rouino de la vilo basso, li bàrri, li calado de la vïo Doumitia, lou pont rouman Sant-Ambroi que n'en rèsto qu'uno arco.

Gustavo Courbet pintè aquéu pont en 1857, emé encaro si 4 pilo.

A la fin de nosto passejado lou cèu s'embraso de coulour rougejanto, la naturo touto fernis, la luno pounchejo e inoundo de sa clarta lou pichot vilage endourmi que ié fai bon viéure.

Adeline Martinez

MOUN VILAGE

De moun vilage sabe pas ço que poudriéu dire : i'a pas de castéu d'un noble dins lou terradou, i'a pas un terme milaire 'mé un chifro rouman grava dessus, i'a pas uno residènci d'estiéu d'evesque de Nime, i'a pas uno poulido font escrinçelado sus la plaço, i'a pas... i'a pas...

Vau miés arresta de rena estènt que, pichoto ai tambèn après e descubert un mouloun de pichòti causo dins moun vilage e acò coutinuio encaro.

Pèr eisemple : anave à l'escolo mounte chatouno e drole erian mescla dins li classo (franc i recreacioun ; uno cledo nous deseparavo) e aquelo « mescladisso » a fa gréia uno bèlo amista, e aro couro nous rescountran, se poutounejan coume s'érian cousin !

Dempièi quauqui tèms an abóusouna l'escolo, pèr ié faire de « loujamen souciau » e la court es pèr renja li veituro. Vuech annado à la seguido, l'escolo fuguè nosto secound oustau, e pèr acò sian un mouloun a pensa qu'aurien poussu sauva la façado qu'avié bon biais, mais li gènt de mestié avien belèu de bòni resoun...

Mi gènt restavon dins la gran carriero, fuguè aqui qu'aprenguère à pedala à bicièucleto à l'ouro de la dourmido de l'après-dina. Fau dire qu'èro pas dangieirous coume aro !

Es tambèn dins aquelo carriero que sachère legi l'ouro au grand reloge de la coumuno : sourtiéu sus lou trepadou davans la porto, relucavo lou cadran e pièi, fieroto mounstravo emé li det la pousicioun dis aguio, e ma maire reviravo !...

Couro ma maire anavo pèr lava à la font, m'afecionavo de l'acompagna pèr sabouna li moucadou, mai tambèn pèr retrouba aquelo aigo tan fresco, tan agradivo, clarinèlo, que rajavo sènsò relàmbi. Un jour devistero uno couquiho presouniero (dempieï quant?) dins la peiro d'óu barquièu : èro majico !...lis esplico que me baièron lis comprenguère que forço tèms après.

Nosto coumuno faguè « Sans Miquèu » en 19... Aro s'atrovo dins uno bastisso counstruito à la fin dis annado dès-e-nòu-cent (o debuto dóu sièucle vinten) dins l'estile di « Folies de Mounpelié », au mitan d'un grand pargue bèn poulit, emé d'aubre centenàri de noste miejour, emai quauquis-un estrangié. l'avié davans l'intrado un tras que bèu bacin redoun emé de jo d'aigo, e bèn i'a quauquis an, l'an leva ! Quenté daumage !

Forço famiho abarissien un porc pèr aguè de carsalado tout l'an. Ero ma maire que charcutejavò encò d'aqueli gent. léu, après ma journado d'escolo, veniéu la retrouba es ansin qu'ai descubert que lis oustau avien pèr darrié uno coureto e un pichot membre 'mé uno pichoto chaminèio pèr alesti la car dóu porc en carsalado.

Avans, dins ma jouinesso, amave moun vilage mai sabiéu pas perqué (coume Moussu Jourdain!) aro sabe perqué l'aime : pèr toutis aqueli remembranço.

Maisse, maisse desempièi un moumen, e vous ai pas di lou principau : demore à Bouiargue, lou païs dis « Escambarla ».

NOSTRE PUS BEU FLOUROUT

En l'ounour de l'aducioun d'aigo.

1

Roumanih'e Mistrau qu'an canta la Prouvenço
De Marsih' à Touloun e d'Arl' en Avignoun,
An fa sa largo part à la Terro d'Argenço
E Jounquiero ié dèu soun glourious renoum.

2

Car sian lis eiritié d'uno grandò lignado
D'aqueli qu'an basti la gleiso Sant-Laurèns
E nostre vièi castèu quiha sus la mountado,
Rousiga pèr la pluei' e fouita pèr lou vènt.

3

Tambèn, i'a cinquant' an s'aubourè sus la plaço
Nostro bello coumun', ourguei de la cièuta,
Que de la countempla, jamai la vist' es lasso
Talamen soun estil' es di miés capita.

4

Quand passas sus la rout' entre Nim' e Bèu-Caire,
Badas d'amiracioun davans nostre mercat :
Es aqui que s'adus lou rasin dóu terraire
Que de touto la Franç' es lou pu recerca.

5

Mai nous semblav' estrang' en un parié vilage
Au terren fresquierous que gounflo lou rasin
De nous trouba sèns aig' alor qu'à cha grand viage
Remplissian la Coupé mount' aboundo lou vin.

6

Enfin ! se d'asard vèn de tèms de secaresso,
Se nòstri vièio font s'areston de coula,
Aro sian bèn segur que l'aigo tant proumesso
D'en aut dóu « réservoir », jamai s'agoutara.

7

Vautre, lis artisan d'aquéu galant oubrage,
Pèr vostre gaub' avès redaura lo blasoun
De nostre bèu païs qu'ar'à travès lis age,
Poudra vèir' apoundu lou pu brihant flouroun.

Jounquiero lou dès de novèmbre 1951.